

Wosi Phawulosni Hepsa Wosiya Teselonqeki Asuni Meyak Gachgiru

Kiristoosni hepsa yooni chowaasta kabi mam-suus shorko kabgit hamna boor'a Teselonqeki betekiristaniissi fa rakkoos arkit hami. Phawulos Teselonqeki asuni meyak tichina hepsa wosiyaas «Daamiis yooni wonaas kar'i» yifa amantoos zag-gira maket faar. Phawulos dey Kiristoos yoobaas-neen zeemman «Manguni asu» yistefe Kiristoosni tugga'efe basa zoonsiyaasik han daasta man-gunewa jallinne arkit hamana yit baasso aman-tooson kaynuk kabe.

Wosiis feretife baasso shananewa rakkone baassosta arkifanaknu amantobesiisik zagusonek barnawa oom wostoni zomobaasakitona zagsefeesimato foobesiisik sholsiison danak chimme wostosonek; esiisimato dey ma'a wostoonon wostet fooson beyonoytemato zaggire kiiti.

Matsafaas Sir Ephna Ephobaas

Gachgiru 1:1-2

Galatanewa adarane 1:3-12

Kiristoosni hepsa yoosik imte assu 2:1-17

Kiristinnani fooni kiito 3:1-15

Koor'uba 3:16-18

¹ Aba Ha'oosir sina baassotnawa Daamni Yesus Kiristoosnir sina Teselonqeni betekiristaniisi feese amanyinyini meyak Phawulosnik; Silasnikinnawa Ximotiyosnikinna woste wosiya;

² Aba Ha'oniiskinnawa Daam Yesus Kiristoos-nikinna otumnawa nagane nittok sinfawungwa.

Kiristoos Wolle Yeefena Kabaasik Imtoni Mang-suni Kar'a

³ Ayni meyane! Amantontiis wonna wonna dichet hambaasiknawa nittotna nittotna asi keeshtanaas dey daysit hamdifar sinna boor'ana Ha'ooson mai'sira galattonik sholsuwa.

⁴ Es bari boor'a awune faaronnu akama rakkonewa shanane nittoosta kar'fanaknu nitto aakkak faksetimatonawa amantonitisik dey aakkak chimesetimatona Ha'oni betekiristaniisikitoni ganeyaassi faani kabaasik nittoktu teetefeniwa.

⁵ Es bar zuuttambaase besifanaas Ha'oosi mangsuni kar'a futo sinbaasonnawa shana ephpha taaseti Ha'oosi taatosi giruk chimme hoorere feer zagukwa.

⁶ Ha'oos futok mangsu kar'ar sinna boor'a nittoosta shana katisefe baassosta shana teshok waagbesiison kaasunawa.

⁷ Hash shana ephpheteese nittok dey innoneen ane beysa imanawa. Es bar dey sinanaas Daam Yesus akama hugnabesi faana wosibaasikitoneen ane saman yeefena kabaasikwa.

⁸ Es kabaasik saamet di geyak Ha'ooson arunoy baassotinnawa Daamni Yesus Kiristoosni Misirachchuni kaamaasik ajajamonoy baassotinna ke'una.

⁹ Baasso Daamiisa sintannawa akama hugnabaasi ulfintanna oor kesere koi'ba foonto tishuni ke'o ephphetoosone.

¹⁰ Es wono Daamiis kortoni meyak ulfinton-aknawa barik amanefe baasso zuuttambesiise

asik diinqostonakna yeefena kabaasikwa. Nitto dey inno makeni zaalaason ephpha taara amane-seti boor'a kortoni meyaneeen anetu faadtosotiwa.

¹¹ Es baron safarok nitto chowaasik wonna wonna yeetunoy shiiphet faaniis Ha'oniis nittotin teegena teegoosik hoorer sinatiknawa ma'aron zaguk fa fiqadintiisewa amantoni wostontiison zuutire hugnabaasik koi'sunakwa.

¹² Esiisimato dey Daamni Yesus Kiristoosni sunaas nittok ulfintonaknawa nitto dey Ha'oni sina Daamni Yesusni otmaasik kaputtera barik ulfintotiknatu shiiphefeniwa.

2

Mangu Wostoni Asu

¹ Ayni meyane! Daamni Yesus Kiristoosni yoosewa inno dey barneen ane sinanik zuuttoni bari chowaasiktu nittotin shiiphefeniis;

² Raajik wedey kaamak maktenaasimato wedey innokin tichche wosiyane faaron zagira: «Daamiis wolle yoona wonaas kar'i» yit kanuntiis shorkon-aata wedey nawonaata.

³ Oonu aaffa ugnaknu nittotin eshanaatawa; zeemma mormoos yoonoyfeen; geeni keer giruni mangu wostoni asus ammanon kesse bestonoyfen es wonaas aafa yoonawuza.

⁴ Es mangu wostoni asus ha'o yistera shiiphtefa barikito zuuttambaase asiistan denalo teetbaason tegguna. Bar dey: «Ta Ha'o» yit Ha'oosi beteme-qdesiissinu dey diire awastonak zaguna.

⁵ Nittoneen ane faana kabaasik es wuzason nit-tok makena baron aane yaadatowetinoso?

⁶ Wonbaas kar'in ammanon kesse bestona wona kar'ana kabaneen hash ammanon kesse bestonoynamato barin awu kalnamato nitto arsedifetiwa.

⁷ Mangu wostoosi aacho hugna hashnu wostettu fa; sinuntano hash baron kalnir faarwa; es bar dey sinanaas es baron kalfa bar ugnaastan shaatona kabaneengwa.

⁸ Esseen orfo Daam Yesus noonobaassin katfena kataasik tishkuna barewa addak yoobaasik tishikuna mangu wostoni asusna ammanon kesse bestona.

⁹ Es mangu wostoni asus yoonas Sexanani hugnak daagsuni biistera artonoy wuznewa besone dey diinqi wuzakitone asinna zagukwa.

¹⁰ Esiisimato es tishuni asuni meyanon eshanaas showo tesa mangu wuzasikitonon zagitwa. Es asuni meya tishshonees dey farsonek zaguni futooson shunne ephphetoo beyete boor'awa.

¹¹ Es bari boor'a Ha'oos eshaasik amanosonek daagsuni hugna baassosta wosuna.

¹² Es bar dey sinanaas futooson aafa amanon-iwuza yisefaat boor'besiisik girsefe baasso zuut-tambesiise asiista mangsu katonakwa.

Farusonek Korte Asuni Meya

¹³ Daamiisik shunto ayni meyanee! Inno wonna wonna nitto boor'a Ha'ooson galattonik sholsifawa; Ha'oos Ayyanabaasik korto zagina boor'anawa futoosik amanera farusotik zeemma nittotin korina boor'awa.

¹⁴ Daamni Yesus Kiristoosni ulfinaason haa'osotiktu inno nittok makeni misirachchuni kaamaaski kamo nittotin teegewa.

¹⁵ Es boor'a aytaasakitono! Chimmā yerotiwa; kaamniisik sinun wosiniisik inno nittok makeni assuuson zaggira ephotiwa.

¹⁶ Daamni Yesus Kiristoosnawa innotin shuna; otumbaasik koi'ba foonto chimaason; ma'a abdiison innok ima Aba Ha'oniise;

¹⁷ Ma'ar sina wuzason zuutira zagutiknawa makotikna nibnitiison chinawungwa; ma'a wuzason zuutira zagutiknawa wollotikna nittotin chinawungwa.

3

Innok Shiiphsoti

¹ Koi'baastak dey ayni meylene! Nittokik sinaysimato Daamiisa kaama taptera zi'unaknawa ulfintonakna innok shiiphotiwa.

² Esiisimato dey kaambaason ode baasso zuuttambesiise amasonirtewa; es bari boor'a eling asuni meyakinnawa mangu asuni meyakinna fui'tonik innok shiiphotiwa.

³ Sinuntano Daamiis amanamtowa; bar nittotin chinuna; Sexanaaskin dey nittotin oodanawa.

⁴ Nittok ajajeni baron hash sinun hanneen zag-sotimato Daamiisik nittotin amanefeniwa.

⁵ Daamiis nibnitiison Ha'oosi keeshtanaaskinawa Kiristoosni fakiyaaskina nittotin zoonsawowa.

Wosto Kotosonoytemato Zaggire Make.

⁶ Ayni meylene! Wosto kotefe baassostannawa innokin makte assusimato foonoy kiristana zuuttambaase asisatanna oor kesatik Daam Yesus Kiristoosni sunaasik nittotin ajajefeni.

⁷ Inno besini besosik zoonustotik sholsifanamato nitto teetnitiisik arsefetiwa. Inno nittoneen ane faani kabaasik wosto kota asu aane sineniwa.

⁸ Dey aaffe asuni tushanu baak aane muweni; sinuntano nittoossin ooniistanu ba'a sinnoynimato waalaknawa wonakna hopitnawa kabetna wostet faanir.

⁹ Es baron zaginiis inno besini besosik zoonustoti uuktano nittokin innok argasu dananik mab-tini tishifaantawa.

¹⁰ Nittoneen ane faani kabaasik: «Wosto shunnoy bar muunaatawa» yifa tuma nittok imma faanir.

¹¹ Es baron yiniis nitto ganeyaassi isa isa meya wostoni kotinynya feeseter sinnamato odefaatwa; es asuni meya baassotin tiir'onoy wuzaassi girsefaafe oomni meyanon rakkisutano aane wostesefe.

¹² Es effetena asuni meya diire wostosoneknawa foobesiisik sholsuuson danoneknawa Daam Yesu Kiristoosni sunaasik baassotin ajajefeni; dey kiitifeni.

¹³ Sinuntano nitto ayni meyanee! Ma'a wostoni wostoosta mikishotiita.

¹⁴ Han wosiyaassi nittok makeni kiitooson ephphetoonoy asu feefaananee es asusin gasasutiwa; wostobaasik iichchonak barneen ane isar sinatiita.

¹⁵ Sinuntano ay zagira ke'utitano guma zagira faadutiita.

Koi'ni Nagani Ooshsho

¹⁶ Nagani Daamiis teetbaasik wonna wonna zuuttambaase asik nittok nagaason imawowa; Daamiis zuuttamnitisneen ane sinfawowa.

¹⁷ Han nagani ooshshoni tichaason kushunaasik tichiis ta Phawuloswa; ta wosiya zuuttambaase asiissi fa mallatoos haniiswa; tichifanaas dey ekkawa.

¹⁸ Daamni Yesus Kiristoosni otmaas zuuttamni-tiiseneen ane sinfawungwa.

Gaddo Teyya
The New Testament in the Yemsa language of Ethiopia,
Latin script

copyright © 2025 The Word for the World International

Language: (Yemsa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-06

PDF generated using Haiola and XeLaTeX on 19 Dec 2025 from source files dated 6 May 2025

7608a66e-9602-5623-89f0-436ebf008df3